

Siunnersuummut oqaaseqaatit

Oqaaseqaatit nalinginnaasut**1. Aallaqqaasiut**

Siunnersuutikkut 2019-imut aningaasanut inatsisip akuersissutigineqarnissaanut killiliussaq ullormut 26. november 2018-imut sivitsorneqarpoq. Tamatumalu nassatarisaanik Inatsisartunut kommunalbestyrelsinullu killiliussat arlallit allat sivitsorneqarput, takukkit siunnersuummi immikkoortut pingaarnert aalajangersakkanullu ataasiakkaanut nassuiaatit.

2. Siunnersuutip imarisai pingaarnert

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 15-imi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni Aningaasanut Inatsit akuersissutigineqartassasoq allassimavoq.

Aningaasanut inatsisissatut siunnersuutip isumaqatiginninniutigineqarnerani piffissamik annertunerusumik pisariaqartitsineq tunuliaqutaralugu, matumuuna 2019-mut aningaasanut inatsisip akuersissutigineqarnissaanut piffissaliussap sivitsorneqarnissaa siunnersuutigineqarpoq.

Tamatumali nassatarisaanik piffissaliussat allat aamma sivitsorneqartariaqarput:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nuna tamakkerlugu akileraarutit aamma nuna tamakkerlugu immikkut akileraarutit procentii qaammatisiutit malillugit ukioq pineqartoq sioqqullugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut annertussilerneqartarput. Taamaammat siunnersuutaavoq ukioq manna piffissaliussaq, aningaasanut inatsisissap akuersissutigineqarnissaanut piffissaliussaq assigalugu 26. novemberimut sivitsorneqassasoq.

Aningaasarsianit akileraarutit pillugit Inatsisartut inatsisaanni (§ 62, imm. 2-mi) aalajangersarneqarpoq kommunimut akileraarutissap procentia qaammatisiutit malillugit ukioq pineqartoq sioqqullugu 1. december nallertinnagu kommunalbestyrelsimit aalajangerneqartassasoq. Kommunit missingersuusiortarnerat, aningaasanik tigoriaannaateqarnerat, naatsorsuutaat, kukkunersuusoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaanni nr. 3, 3. februar 2012-imeersumi aalajangersarneqarpoq, kommunit ukiumut aningaasanut inatsiseqarfiusumut tullermut missingersuutaat kingusinnerpaamik kommunimut akileraarutit procentiata, aningaasarsianit akileraarutit pillugit Inatsi-

sartut inatsisaat malillugu annertussusilerneqarnissaanut piffissaliussaq nallertinnagu akuersissutigineqarsimassasut.

Aningaasanut inatsisissap suliarineqarnissaanik kinguartitsinerup aammattaaq kingunerissavaa kommunit kommunalbestyrelsillu 2019-imut missingersuutinik kommunimullu akileraarummik akuersissuteqarnissaminnut piffissakinnerunissaat, tamannalu kommunit aalajangersakkanik taakkuninnga malinninniarnissaannut ajornakusoortitsisinnaavoq. Taamaammat siunnersuutaavoq 2019-imut kommunimut akileraarummik annertussusiliinissamut piffissaliussaq 6. decemberimut sivitsorneqassasoq.

Meeqqanut suli atualingitsunut perorsaanikkut inerikkiartuutaasumik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi (§ 1, imm. 1-imi) aalajangersarneqarpoq, kommunalbestyrelsi meeqqanut suli atualingitsunut ulluunerani neqeroorutinut ukiumi tullermi akigititassanik kingusinnerpaamik novemberimi aalajangersaasassasoq. Aningaasanut inatsisip akuersissutigineqarnissaanut piffissaliussamik kinguartitsineq kommunit aalajangersakkanik taakkuninnga malinninniarnissaannut ajornakusoortitsisinnaavoq. Taamaammat siunnersuutaavoq 2019-imi akigititassanik annertussusiliinissamut piffissaliussaq 6. decemberimut 2018-imut sivitsorneqassasoq.

3. Pisortanut aningaasatigut allaffissornikkullu sunniutissai

Siunnersuutip pisortanut sunniuteqangaarnissaa naatsorsuutigineqanngilaq. Kisianni missingersuutinik, akileraarusiissutissat annertussusaannik aammalu meeqqanik paaqqinninnermut akigititassanik nutaanik akuersissuteqarnissat pisarnermit kingusinnerusukkat pissapput.

4. Inuussutissarsiutinik ingerlataqartunut il. il. aningaasatigut allaffissornikkullu sunniutissai

Siunnersuut inuussutissarsiutinik ingerlataqartunut aningaasatigut sunniuteqanngilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqanngilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqanngilaq.

7. Naalagaaffeqatigiinnermut Namminersorlutillu Oqartussanut tunngasut

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqanngilaq.

8. Oqartussaasunik kattuffinnillu tusarniaaneq

Siunnersuut piffissakilliorneq pissutigalugu tusarniaassutigineqanngilaq. Siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit sularineqarpoq, soorluttaaq kommunit tamatuminnga ilisimatinneqareersut.

Siunnersuummi aalajangersakkanut ataasiakkaanut oqaaseqaatit

§ 1-imut

Imm 1-imut.

Inatsisartut 2019-imut aningaasanut inatsisaata kingusinnerpaamik 26. november 2018-imi akuersissutigineqarnissaa siunnersuutigineqarpoq. Taamaaliornikkut Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussaq atuuttoq (15. november) avaqqunneqassaaq.

Imm. 2-mut

Nuna tamakkerlugu akileraarutip 2019-imut procentissaasa kingusinnerpaamik 26. november 2018-imi annertussusilerneqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61-imi piffissaliussat atuuttoq (15. november) avaqqunneqassaaq.

Imm. 3-mut

Kommunimut akileraarutip 2019-imi procentiata kingusinnerpaamik 6. december 2018-imi annertussusilerneqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 62, imm. 2-mi piffissaliussaq atuuttoq (1. december) avaqqunneqassaaq. Kommunimut akileraarummik akuersissuteqarnissamut piffissaliussamik allannguinerup aammattaq kingunerissavaa kommunit 2019-imut missingersuutaasa, Kommunit missingersuusiortarnerat, aningaasanik tigorianaateqarnerat, naatsorsuutaat, kukknersuisoqarnerat kiisalu karseqarnerat naatsorsuseriveqarnerallu pillugit Namminersorlutik Oqartussat nalunaarutaat nr. 3, 3. februar 2012-imeersoq naapertorlugu akuersissutigineqarnissaannut piffissaliussap taamatulli tassaalernissaa 6. december 2018.

Imm. 4-mut

2019-mi nuna tamakkerlugu immikkut akileraarutip procentiata kingusinnerpaamik ulloq 26. november annertussusilerneqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 64, imm. 2-mi piffissaliussaq atuuttoq (15. november) avaqqunneqassaaq.

Imm. 5-imut

Kiisalu siunnersuutaavoq, meeqqat suli atualinngitsut kommunit ulluunerani neqeroorutaannut 2019-imi akiliutissat kingusinnerpaamik 6. december 2018-imi annertussusilerneqassasut. Taamaaliornikkut Meeqqanut suli atualinngitsunut perorsaanikkut inerikkiartuutaasumik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi § 1, imm. 1-imi piffissaliussaq atuuttoq (kingusinnerpaamik novemberimi) avaqqunneqassaaq.

§ 2-mut

Inatsisip tamanut nalunaarutigineqarnerata aqaguani atuutilernissaa, ullorlu 1. januar 2019-imi atorunnaarnissaa siunnersuutigineqarpoq.